

Mvù Jûde

Bèh bieê

¹ Né mè Jûde, nùà seê Yeésò *Kristò; mè né òm Ják. Mè nyagá njií né mé bí bòó mé temé Càn né yoòr bìi, bí bòó mé Càn Tele beèh né bí yilá, à né bí beè Yeésò Kristò kurú kwaá òóh.

² Bú a, kó bí jere teèn; òólé mé gwaân seèn a, yám siè bí beè.

Bò ògòr nyenyenê feh gòò (2 Piêr 2:1-17)

³ Bò mbeí mò, mè lé tétég lege loóm naâ ye te mè nyagá njií bí mvù felè ceér mé béh bí òóh òde gi né teèn yili yuo. Mé njéh mene, kò mè bí nyagá seér mvù dé hên, te toó nyegé bí toò, te bí lege njií ceér Càn ter. Né ceér dé kèi cên mé à lé naâ mé bò dé seèn haá.

⁴ Wanòóh bò jéré-temé bò déi baá lètenè bìi nabé yilá; fùgò Càn mé béh né dé lòu kuú òde hên, bó né bú lòu feré seér, bó né ceér teèn kwa keéh, te bó teré yilá kò te núlu. Bó yeé baá ménâ bòó, bó né Yeésò *Kristò gòndòh Nùà kòò beèh cén mé njéh gè jomo yalé si njií. Sâ Nùà Dueè né lom bú òò. Kwá-re òóh òò mà, bó òde né gèr òné, dàb mé mvù Càn luóm kwaá gi aá kèn, ye bò sâ bò òde né ju òde.

⁵ Mè kò né ye bí né gi bagasé kòó nyegé. Mé njéh mene, bí kwá mè kemá weh cu bí gèh dé mé

Nùà Dueè lé yili soóm naâ dàm bò huaán *Iserála te tàbè Ejíptò hên ye. À lé naâ bó yili soóm; mé njéh mene à yeé ñene bò déi temé yoòr seèn kwá njí ñgwéh, à wula soóm gi bó.

⁶ Lé naá cuù mé bò cili Càn ðéi ménâ ndo; bó yeé baá mé feh boòn den, bó faá Càn lé tueé naâ no dèn cú, Càn lé naâ mé bó ké kundun te ndèndèn cibî mgbátág sie ndeé, à ferá lo bó te fògò lòñe. Wa hên bó bó née ka ké sâ jueé den ye. Càn ye, mo cieé ju tenâ ndeè waà baá, bó ju die ye dé tíndôg.

⁷ Lé naá cuù mé *Sódom bò *Gomôr mé bò loó kukwarè ménâ ndo. Bó né be mé sár kwaá njíí. Njíí mé môn sam bèh, bó boó seér cí. Yeé yogo baá, ñgwéh Càn lé naâ bó we tarê yoòr jege si, te nuàr kàn ñgwéé kwaá dé seèn tieè wa?

⁸ Mè tueé bí, bòó mé né lètenè bìi nabé yilá hên, né ménâ boó ndo; bó né ndòn jurá se bele, bó né bò nuàr te núlu mé njéh kulu su, bó né terreb dé Càn mé njéh seb, bó né bò kokoô bò ké ter ka vulúu séb teèn tobé yíí ndo.

⁹ Sâ gèh njíí bú séná, né mene Mikael cili Càn dé koô doô, lé ménâ bó ná ñgwéh. Bò *Sátàn lé né mene togo felè komó Mùsì nde, bó né kweé kuú, mé njéh mene Mikael lé gwàn ná ñgwéh Sátàn ju yoòr luú njíí, à bú lòu séi ñgwéh ndo, à tueé cegé ye bú a: Bî Càn jue nde né koó.»

¹⁰ Dé bò nyeên bò hèllè môn sam. Njíí mé bó ñgwé kó ñgwéh doón, bó né mbaá selé njíí. Bó

né faá b̀ nyam ya dueè ǹ munó cur g̀. B́ sé yeé baá ménâ fur g̀, b́ leér le keéh teèn.

¹¹ Gèr b̀òn f̀ nd̀! B́ b̀òn gèh ceér Kaïn sâ belé né dé keì? B́ b̀òn te kàgàlòn faá Balam ǹ die sabé yila né dé keì nd̀? B́ mbaá kú ñgwéh, yìè né ka mé táre-feh b̀òn faá Korê ǹ.

¹² M̀ b́ né lètenè biì teèn, loù kúmnjũg* sâ b̀ ǹàr nde né felè b̀òn cenné dielé keéh. B́ fegùlì kwá bèh, b́ k̀ cegé yeé dé b̀òn, b́ dé ǹàr táñ bèh. B́ den né faá vúlú nuù ǹ mé fu né mé njéh kobó j̀g̀ó ndeé, nu teèn sam. B́ den cu né faá tou ñgiín nd̀; né mene jàtenè, b́ tàb wá bèh. Komó jaâr te mbeì fà mé j̀g̀ob muró die gi aá cie kèn, ceré né b́.

¹³ B́ den né faá leba nòmò koò furú ñaán yeé ké dùà ǹ. B́ né b̀ seé fegùlì b̀ó bele, te b́ sé yeé yuo, cíciíb huar le. B́ den cu né faá mbentò sàr nd̀. Bèh denè b̀òn dé kèi cèn mé Càñ kwaá né b́, né lom ké kundun te ndèndèn cibì mgbátág.

¹⁴ Né Hénòg, ndùté ndùtù Ádàm, huaán dé lèmè téhbeèh né bú, à l̀ naâ felè b̀òn ñenè, Càñ l̀ ye bú a:

Júée b̀ ǹàr a: Ñgwé,

Ǹà Dueè ndeé né mé b̀ cili seèn dé jojoloò kem waâ, b́ nde lom né mgbón mbaá,

¹⁵ te à weh sie ju felè ǹàr wón d̀ón tenâ ma, te b̀ jéré-temé b̀ mé lé naâ taáb mé bú lieé njiì d̀ón yila gi beè mé jéré-temé b̀òn sâ.

1:11 1:11 Gen. 4:3-8; Nomb. 22:1-35; 16:1-35 * **1:12 12** Mbè mé yáb dé maàn. À due lemé né mbàgà, ǹàr d̀ón sam. **1:14 1:14** Gen. 5:18, 21-24

Bòó mé lé naá giì bú bò ñgòr jéré-temê yoòr tueé
njíí dɔ́ɔ́ɔ́ nde gi né gèr mé nyie fí yieé.»

16 Bò nùà hèn né yɔ́gɔ́ bòn; cu dɔ́ɔ́ɔ́ temé bɔ́òn lè
nóré bèh; sònò mbembaá ndugó gɔ́ò né seé bɔ́òn;
bó ñjèh dɔ́ɔ́ɔ́ bɔ́ò ñaáɔ́ gɔ́ né mé feh bɔ́òn; seé
bɔ́òn né ñgòr mènàɔ́ sònò tueé gɔ́ò faá bèh sâ
ndo; bó gwagá yieé lom né mé tánágá, bó ñueé
mé leba.

Bèh ndêb

17 Bò mbeí mò, bò ñgòr mé bò mbòn tebê
Fehtoò beèh Yeésò *Kristò lé naá bí toò tueé kwaá
doò, bí té nyèn.

18 Bó lé ye bí a: mɔ́ ndeè baá te nàm cèrè jomò
wa, bò nuaré déi ndeè né yuo kelâ, bó weh bí séb
ma; wa bó nde né mé bò ñjèh vevenê faá temé
bɔ́òn gwaán nê nɔ́, bɔ́ò kuú ndo.

19 Mè tueé bí, yìè kèrrè lètenè bò nùàr né bò
sâ bò. Bó mé Cúcuí Càn yoòr sam, yoòr bɔ́òn tab
lom né ñjèh wôn.

20 Dé biì bò mbeí mò, bí fágá feh, bí kwá yám
njí lòm temé cén yoòr Yeésò, faá Càn né bí feh
nɔ́. Bí dùà lòm Càn mé terreè Cúcuí Ñagá mene
dɔ́ɔ́ɔ́.

21 Càn né bí gwaán, bí mé dèn gí ka seèn nɔ́ɔ́ɔ́,
bí né Fehtoò beèh Yeésò Kristò mèi bò húóm-
temé bò teèn gaán den, te à ndeè cuù, bí kwa
yòn tètàgá beè seèn.

22 Bòó mé né beè Yeésò den ndòré gɔ́, bí kó bó
jere teèn,

23 bí yìlì sòm sér bó lòu, bí né bó tuar gellé
som keéh. Bí kó cú bò mbaábi déi jere toò faá

bèh sâ ndɔ. Njèh cén, bí ciéŋ lòù, bí dùlà bílí mé
bò kurú cògò bɔ̀òn mene, wanɔ̀ón dé sâ né seé
ŋàŋ yoòr.

Bèh Càŋ seén cerê

²⁴ Dɔ̀ón né gi beè Càŋ. À né mé terreɓ, à nde
né bí cií te bí diè cú. À nde né bí ké mbàm bèh
*sùsùm weh njií, te bí den lom toò seèn kóbè sâ,
bí samé kuú mé vógó-temé beè seèn.

²⁵ Béh sén bú seèn! Càŋ sùsùm gi lom né bú.
À béh mé Fehtoò beèh Yeésò Kristò yili sɔ̀m né
kɔ̀ó! *Wón dɔ̀ón a, vèh bílí gí mou terreɓ seèn
hên veèh. Nùà sùsùm gi cegé né bú; be terreɓ
seèn cie dé kèi cên ŋené le lom nde né kɔ̀ó. Lɔ̀
duɔ̀óm naâ mân, née den ka môn ye, nde den cu
nde né kèi cén ménâ tóg dé tueê sam. È môn!

Mvù Ngòŋ Feê
Mambilla NT (Cameroon-Le Nouveau Testament en
mambila)

copyright © 2001 Wycliffe Bible Translators, Inc.

Language: Cameroon Mambila

Contributor: Wycliffe Bible Translators, Inc.

All rights reserved.

2025-05-13

PDF generated using Haiola and XeLaTeX on 13 May 2025 from source
files dated 13 May 2025
f0e8e7ba-c2cf-57f7-9a60-8ff0e792e158